

Guekcoj Youq Ndawsim

祖国在心中

武鸣县中桥小学六(3)班 詹耀钧

Lauxsae, doengzhag:

Daihgya ndei. Mbat neix gyoengqraeuz hopheux “Guekcoj Youq Ndawsim Gou” aen cujiz neix, gaihcanj le baez swnghhozsing yozsiz hozdung ndeu. Youq mbat hozdung neix, raeuz rox le guek raeuz haujlai vunz okmingz gyaez guek haenx, rox le haujlai gojgaeq gyaez guek gyoengqde, caemhcai qiepsouh daengz gyauyuz gig laeg, gyagiengz le gyaezguekcuiji cingzcauh.

Aiq miz mbanj doengzhag cam gou: “Gyaez guek gyaez guek, gawq yawj mbouj raen, hix lumh mbouj dawz, gijmaz heuh guh gyaez guek? Caij baenzlawz gyaez guek ne?” Dwg ha, mwngz daez aen vwndiz neix, couh dwg ngoenzneix gou yaek gangj lo, aenvih aen dapanq vwndiz neix couh dwg gou youq mbat swnghhozsing yozsiz hozdung neix souhhoz cei q hung he.

Gijmaz dwg gyaez guek ne, Lezningz gangj: “Gyaezguekcuiji dwg cungj gyaez guek cingzeiq cei q laeg ndeu, de dwg cingzeiq cien bak bi cien roengzdaej sawj vunz gag rox gyaez guekcoj swheij.” Gou roxnyinh, Lezningz gangj ndaej gig deng, gyaez guek couh dwg cungj cingzeiq ndeu, cungj cingsaenz ndeu. De dijen youq ndaw gidij hengzdoengh bouxvunz.

Ciuh Cunhcuuh, Yenswj mbouj baenz mbauq, hoeng baengh aen bakraeh de, buek hingz Cujvangz, veizhu le guekgya cunhyenz, gij cingsaenz de ndaej hawj raeuz hag. Ciuh Cangoz Lin Siengyuz, vihliux gouq guekgya mbouj deng Cingzoz hoenx ciemq, mbouj goq diuzmingh swheij, daiq Hozsibiz bae Cingzoz, doeklaeng de mbouj guhfu Cauvangz saenqnyaemh, ndeilili dawz Hozsibiz ma Cugoz, lij sawj Cugoz mienx deng cainanh.

Gyaez guek mboujdan dwg aeu coengmingz doengh uk, vanzlij aeu mbeihung maenh’ak. Ciuh Handai boux cienglingj okmingz Lij Gvangj, aemq cax gwih max, youq gwnz cancangz bonghfaengfaeng, dawz Yunghnuz gaj dwk cungj mbouj lw saek boux. Mingzcieng Yoz Feih ciuh Sungdai, caen gyaez guekgya, youq gwnz cancangz, baklem hawj dizyinz saenqdaenh. Ciz Gi’ gvangh seiz Mingzcauz, caennang hai ruz bae boenq caeggeq Yizbwnj. Engq miz Yangz gyahcieng sai mbwk laux iq, itheij bae cancangz, vih guekgya vutmingh……Daj ciuhgonq daengz seizneix, boux gyaez guek geq cungj geq mbouj liux, goenglauz gyoengqde ciengxlwenx geiq haeuj ndaw lizsij.

Gyaez guek mbouj faen gviq cienh, mbouj faen laux caeuq nyez. Bouxguen bouxhak ndaej gyaez guek, gyoengq bekking caemh ndaej gyaez guekgya. Sunh Cunghsanh hoenx caeggeq dwg gyaez guek, Linz Cwzciz youq Hujmwz coemh iennamh dwg gyaez guek, Canh Denhyou cujeiz coih guh dietloh caemh dwg gyaez guek. Youq ngoenzneix, gij lwghag daj guek rog dauqma, gensez guekgya dwg gyaez guek, gajfangginh henhoz henzguek dwg gyaez guek, couhcinj dwg bujdungh gunghyinz, nungzminz gangj coenzvah gvansim guekgya, di gunghyenz ndeu, caemh dwg gyaez guekgya.

Gyaez guekgya dwg cungj cingzeiq ndeu, cungj cingsaenz ndeu. Gyaez guekgya dwg gidij, gyaez guekgya caemh dwg saedcaih. Gyoengq hagseng iq raeuz caemh ndaej gyaez guekgya, cijaeu raeuz miz aen sim bauqyauq guekcoj, roengzrengz hag gohyoz vwnzva cihsiz, raeuz couh dwg gyaez guekgya. Vih le hawj guek raeuz fouqmiz, vih le guek raeuz hungcangq, raeuz roengzrengz doegsaw, itheij fwndou ba!

(指导老师:潘彩波)



Saeh Gvaqbae

过去的事

贵港市覃塘区蒙公乡
高占小学五年级 黄秋静



Gou iq seiz, cei q hozhaenz vunzhung: Aen ndang sangngaungau, mboujguen gijmaz doxgaiq ndeigwn cungj aeu ndaej daengz. Gou geijlai maqmuengh swheij vaiq di maj sang ha! Ndigah gou moix ngoenz cungj gyaez ciuq gingq, yawjyawj swheij maj sang mbouj caengz.

Dahnax iq cei q rox simsaeh gou. De laeglemx lwnh gou: Gvaq cieng seiz, youq gungxdou caegcaeg diuq sam diuq, couh ndaej maj sang lo. Gou dingq le, sim’ angq ndaej diuqbwnghwng hwnjdaej, lumj-baenz swheij gaenq maj sang le ityiengh.

Gou muengh ha muengh, dauqdae daengz gvaq cieng lo. Ndwencieng co’ it haetcaeux, gou daenj buhvaq moqsatsat, swnh bouxhung mbouj haeujsim seiz, caegcaeg buet ma ndaw rug, byaij daengz gungxdou dingdingh ndwn dwk, sien haenqrengz sup gaemz heiq he, caij yungh rengz diuq hwnjdaej, it, ngeih, sam, doeklaeng laep lwgda naihsim dwk caj maj sang. Mbouj yaep he, gou daengx ndang ndathuhu, gwnz fwngz hix hanh cumx lo, vunz lumjbaenz hix menhmenh yiengq gwnz maj, maj, maj……

“A, gou maj sang lo!” Gou angq ndaej hemq sing hung dwk buet ok dou rug, buet daengz dangqnaej daxmeh. Gou siengj: Gou seizneix dwg vunzhung lo, wnggai dawz ok gij yiengh vunzhung daej. Sojyij, gou gyajcang “e e” ae song sing laux, siengj yinx daxmeh yawj gvaqdaej. Yienzhaeuh, ngienxgyaeuj enjaek, saenzheiq dwk naeuz: “Daxmeh, mwngz yawj, gou maj sang lo, hix dwg vunzhung lo.” Daxmeh moengjdoengj dwk daengz lwgda yawj gou haijlai nanz, cij naeuz: “Mwngz dah lwgnyez ngawz neix, mwngz lij mbouj dwg yiengh haenx ma? Mwngz siengj maj sang cungj siengj fatbag la!” Gou dingq gij vah daxmeh le, lwngq lo. Hoeng, youh siengj: Gou gaenq diuq sam baez lo, baenzlawz gojnaengz lij dauq dwg yienghceij gaxgonq ne? Gou mbouj fugheiq dwk buet daengz henz aen gingq hung, ciuqciuq gingq, yawjraen ndaw gingq gou lij dwg daemqdetdet, lwgda gou myox lo, raemxda lumj baenz naed duhhenj hung doekbyoegbyoeg roengzdaej, nyex ndaej daengx ranz vunz cungj riuha hwnjdaej.

Doeklaeng, gou cij rox dahnax iq dwg yaeuh gou. Moix baez siengj hwnj gienh saeh neix, gou cungj nyaenx mbouj ndaej fwt riu hwnjdaej.

(指导老师:覃珍团)

Haizgieg Yiengjdekdek

清脆的木屐声

Seizhah mbwn hwngq, daenj haizgieg liengzsangj, vunz lajmbanj maij rag haizgieg youq gyanghongh byaij bae byaij dauq, sing yiengjdekdek, dingq le gag raen miz cungj yinxdaeuz he.

Haizgieg gig genjdan, najhaiz mbouj itdingh aeu guh dwk ndongqmyammyam, mbouj itdingh aeu saidaiz maenhsaedsaed, cij aeu gawq donh benj geng he, ciuq yiengh din hung raez veh vunq, aeu bauh bauh geij mbat; najhaiz loq luemj, daejhaiz caeuq bienhaiz mizdi cocad; ra donh gau lunzdaih gaeuq he, ciuq din hung iq raed aeu diuz he, ding roengz gwnz daejhaiz bauh ndei haenx bae, din baez con haeujbae, couh ndaej daenj de byaij roen lo.

Mbouj miz gij baengz gij naeng got dwk maedsaedsaed, din cienzbouh loh youq baihrog, doengheiq cwxcaih. Rumz cifege gvaqdaej, liengzsis, mbouj yungh gug saihaiz sinhoj, baez hwnq mbonq, din baez con, couh miz gij sing haizgieg yiengjdekdek mbouj dingz mbouj duenh. Couhcinj dwg ngoenz fwndoek, gwnz namh miz raemx hix ndaej vaijloeploep gvaqbae, raemxfwn lumh gvaq najdin, raq liengzsangj he daj byaidin cienh hwnj ndang hwnj gyaiej daej.

Mwh lij iq, aenvih ranz gungz, gou dingzlai dwg loh din, saek seiz hix nanzmienx deng gij doxgaiq geng haenx coeg sieng, incumcum, hawj vunz hojsouh. Daxboh gig saeqsim, de raen le, gig sim’ in. Daxboh miz di dinfwngz, maij doeng loengh sae loengh di doxgaiq, couh caegcaeg gaem fag caxfwz, bae ndaw dong benj gaeuq senj gep benj



geng he, aeu gawq gawq baenz geij donh, aeu cik bang daengx ranz vunz dag din; gaen dwk couh laebdaeb guh haizgieg. Gyangngoenz roengz doengh guh hong, gyanghaemh ma ranz bauz geij amq haeux le, couh diemj aen daengz meizyouz myoxmedmed haenx, gungj hwet dwk, menhmenh muz najhaiz, sing dikdik daekdaek ciengzciengz yiengj daengz byonghhwnz.

Miz gouh haizgieg daej nanwtnt he le, fajdin couh mbouj deng rin camx cenx coeg lo, byaij youq gwnz diuzroen rinbenj ndaw mbanj, daej haiz gvaek roengz gwnz rinbenj bae, yiengjdekdek, gig miz yinxdaeuz.

Cijdwg baez daengz gyanghwnz, gij sing dekdek haizgieg ndeidingq haenx couh noix lo, lwgnyez caeuxcaeux hwnj mbonq bae ninz, cij lw gij sing yiengj haizgieg bohmei nyaengq guh hong haenx. Gij sing haizgieg bohmei mbouj menhyouz geijlai, bohmei ndawndaw rogrog nyaengq guh gij hongranz, ganj youq ngoenzcog okgoeng gaxgonq, dawz hongranz guh sat bae, yienghneix roengz doengh guh hongreih hongnaz couh sim’ onj lo.

(Moz Gingcunh)